

শিক্ষার্থীরা ভুল রাজনীতির শিকার : ডা. আফসারুল

চট্টগ্রাম অফিস

বর্তমানে দেশের বিভিন্ন কলেজ-বিশ্ববিদ্যালয়ের শিক্ষার্থীরা ভুল রাজনীতির শিকার বলে মন্তব্য করেছেন প্রাথমিক ও গণশিক্ষামন্ত্রী ডা. আফসারুল আমীন। তিনি বলেছেন, 'বর্তমানে কলেজ বিশ্ববিদ্যালয়ের শিক্ষার্থীরা ভুল রাজনীতির শিকার হচ্ছে। স্বাধীনতার পর যে সুন্দর শিক্ষাব্যবস্থা প্রবর্তন করা হয়েছিল, পঁচাত্তর পরে স্বভ্রমের কারণে এর ধারাবাহিকতা ব্যাহত হয়। বর্তমান সরকার দায়িত্ব গ্রহণের পর গত চার বছরে শিক্ষা ক্ষেত্রে ব্যাপক সফলতা দেখিয়েছে।'

শনিবার দুপুরে চট্টগ্রাম ভেটেরিনারি ও এনিম্যাল সাইন্স বিশ্ববিদ্যালয়ের (সিভাস) নতুন ভর্তি হওয়া শিক্ষার্থীদের সমারম্ভ অনুষ্ঠানে প্রধান অতিথির বক্তব্যে মন্ত্রী এসব কথা বলেন। ডা. আফসারুল আমীন বলেন, 'দেশের উন্নয়নের অগ্রযাত্রাকে বেগবান করতে হলে মেধাকে কাজে লাগাতে হবে। বিশ্ববিদ্যালয়ের শিক্ষকরা হলেন মেধা বিকাশের মূল কারিগর। তাদের গবেষণালব্ধ জ্ঞান অর্জন করে শিক্ষার্থীরা নিজেদের আলোকিত ও মেধাবী মানুষ হিসেবে গড়ে তুলবে।'

তিনি বলেন, 'চট্টগ্রাম বাংলাদেশের স্বাধীনতার সূতিকাগার। মাস্টারদা সূর্য সেনের নেতৃত্বে এ অঞ্চলে বৃটিশবিরোধী আন্দোলনের সূচনা হয়। ১৯৭১ সালের মহান মুক্তিযুদ্ধে চট্টগ্রাম অঞ্চলের বীর মুক্তিযোদ্ধাদের বীরত্বগাথা ও মুক্তিযুদ্ধের সঠিক ইতিহাস শিক্ষার্থীদের জানতে হবে।'

গণশিক্ষামন্ত্রী বলেন, 'মুক্তিযুদ্ধের মাধ্যমে দেশ স্বাধীন হয়েছে, আগামীতে সঠিক ইতিহাসের পথ ধরে দেশের স্বাধীনতা ও সার্বভৌমত্ব রক্ষা করতে তরুণ প্রজন্মকে মনোনিবেশ করতে হবে।' এজন্য শিক্ষার্থীদের গবেষণালব্ধ জ্ঞান অর্জন করে সঠিক ও মানুষের কল্যাণে রাজনীতি চর্চার আহ্বান জানান। সিভাস মিলনায়তনে উপাচার্য প্রফেসর ড. এ এস মাহফুজুল বারির সভাপতিত্বে অনুষ্ঠানে চট্টগ্রাম জেলা পরিষদের প্রশাসক এম এ সালাম বিশেষ অতিথি ছিলেন। নবীনদের বরণের এ অনুষ্ঠানে সমারম্ভ বক্তা হিসেবে ২০১৩ সালে ভর্তি হওয়া শিক্ষার্থীদের উদ্দেশ্যে বক্তব্য দেন কবি ও সাংবাদিক আবুল মোমেন।

এ সময় অন্যদের মধ্যে বিশ্ববিদ্যালয়ের ট্রেজারার ও ফিশারিজ অনুষদের ডিন প্রফেসর ড. সোমেন দেওয়ান ও ভেটেরিনারি মেডিসিন অনুষদের ডিন প্রফেসর ড. মো. মাসুদুজ্জামান উপস্থিত ছিলেন। সমারম্ভ অনুষ্ঠানে নবীন শিক্ষার্থীদের ফুল দিয়ে বরণ করে নেয়া হয়।